

Ussa ei il temps s'avanzaus e semadiraus per nudar enzacons tiarms dil preziau vischin Marius Beer. La buna relaziun da vischin ei stau il motiv che sia famiglia ha dumandau mei da nudar enzacons passadis ord la veta dil Marius. Sia famiglia ha duvrav spazi per capir e schar medegar empauet il mal e la largia che la mort anetga dil bab, tat, sir e frar ha caschunau.

Plaunet sededesta la natira e porscha immens regals per tgi che schazegia e vesa quels. Quei fuva era il temps zun preferiu dil Marius. El era in grond amitg dalla natira ed appreziava nossa cuntrada singulara cun tut ses regals. Lein prender peda e seregurdar d'enqual fatg ord la veta da Marius.

Il Marius ei naschius ils 25 da schaner 1952 e carschius si a Zarcuns cun sias treis soras pli veglias. Terminau la scola obligatorica serenda el a Tavau per far igl emprendissadi da cuschinier. El ha gudiu la midada navec dil menaschi puril en in liug da renum mundial. Far il cuschinier ha plaschieton ch'el ei daventaus el militer corporal da cuschina e lu seperfeciunaus en sia professiun a Londra, Lausanne, Arosa e Tessin. Turnaus anavos en sia patria ha el fatg schef da cuschina ell'ustria da Milez ed el Hotel Alpsu. Igl onn 1978 ei Marius daventaus bab dalla Jasmin, ch'ei veginida 2011 mumma dil Laurin, aschia ch'el ei daventaus l'emprema ga tat.

Il valent cuschinier ha tschercau novas sfidas cun affittar 5 onns l'ustria Badus e lu 6 onns il hotel Krüzli. En quei temps da far igl ustier ei Marius sespusaus cun Prisca. Sulegl sebratta cun umbriva e la giuvna lètg ha pitiu dalla mort prematura dil baret Nadja (1982). Els han dau damogn e tonpli ein els selegrai dalla naschientscha dil fegl Carlo (1985) e dalla feglia Andrea (1988). Il temps liber era scarts e tuttina ei Marius serendius stediamein cun ses affons ora ella natira ch'el enconuscheva da rudien. Aschia ha el svegliau interess e sensori per las bellezas dalla val. Cun gronda pissiun mava el a catscha. Marius era in catschadur da vaglia e possedeva ina savida extraordinaria dalla natira, la quala el ha era dau vinavon a ses affons.

Denton era Marius s'engaschaus sco ustier da Cungieri, nua che Jasmin ei segidada duront ina sesiun. Deplorablamein ei la via communabla da Marius e Prisca sespartida memia baul, aschia che affons e carschi han giu da pitir dallas diras consequenzas. A partir da quei tierm ha Marius dedicau intensivamein temps e peda a ses affons. Ensemen cul fegl Carlo ei el secasaus a Pitgmun ella casa dils augs che Marius haveva schau renovar cumplettata-

mein. Sper sia laver eis el staus in exemplaric bab ed um da casa. Igl onn 2001 ha ei dau ina brava midada; Marius ei vegnius engaschaus sco schef da cuschina en Tgèsa s. Vigeli, Carlo ha entschiet a Flem igl emprendissadi da cuschinier e l'Andrea ei turnada dalla Svizra centrala per viver tiel bab. Ils cussadents digl asil han apprezaiu zun fetg ils menus variorts ed era las tratgas semplas dil Marius. Culs onns daventa siu pensum da cuschinier in buordi, caschunond problems da sanadad. Ina attacca dil cor e l'operaziun dalla clappa han dau ina viulta marcanta en sia veta. Marius ha stuiu visar sia plazza ed ei cheutras sereratgs e semess empau a bandun.

Mudergiaus da depressiuns eis el sedecidius da far ina cura en ina clinica. Prest ha ei dau migliur ed el ha saviu turnar a casa cun novas perspectivas. La novitat ch'el vegni la secunda gada tat ei lu propi stau la megliera medischina. Cun la naschientscha dalla biadia Vlin il november 2015 ha la veta da Marius survegniu in niev senn e cuntegn. Dalla damaun alla sera era el entuorn sia poppa. Siu quitau per la Vlin ei staus exemplarics en tutt graus. Buca in di leva el munchentar da veser sia biadia. Da tutt'aura ein



els dus i a spass ni han fatg turas pli liungas. Dil tat ha la biadia empriu d'enconuscher prau e prada, fauna e flora e perscrutau massa scazis dalla natira. Senza in bi matg ein els darar turnai a casa. Las flurs alpinas sin las meisas el hotel Posta han fatg parada e plaschiu als hospis.


Sin lur turs ha Marius entschiet a marcar els loghens preferi in rudi sin in crap e tier mintga proxima viseta signava el in radi dapli. La Vlin seregroda bein da quels loghens ed anfla levamein pliras nodas-sulegl da siu car tat. Franc vegnan ella e sia famiglia a cuntinuar cun quella moda zun preziosa e singulara.

Il Marius gudeva era ils dis da fina bialaura fagend grondas turas en munto-gna. Leu saveva el tancar nova energia. Tschiens bellezia fotografias ha el fatg cun siu telefonin e partiu quellas cun biars per WhatsApp.

Dar ina paterlada alla meisa rodunda gudeva el e fageva bugen ina sgnocca ni l'autra e saveva lu rir da bien cor. Cun interess suandava Marius las discussiuns dalla politica communalala e naziunala. El sescuntrava stediamain culs vischins, fageva bugen in survetsch ni mava spontanmein a visitar il seniors ella casa Puntreis a Mustér.

La natira gudeva il Marius da tut temps e saveva sefocusar sil detagl. Aschia rimnava el jarvas, izuns, garnedels e bulius. Dapi entgins onns era el daventaus in ver specialist d'encurir murachels. In collega ha tulanau ch'el duessi dar vinavon quei dun. Bien, il Marius fageva bugen ina stucca ni l'autra ed ha menau il collega sill'Alp Tschamut nua ch'el quintava da buc anflar in soli. Per sia gronda surpresa ha el engartau plirs prezios murachels, il cumpogn buca in. La finala ha el mussau il zup da dus pigns murachels; il rest dalla raccolta ha el rimnau bials e persuls.





Sin ses turs da bulius ord la val haveva el entschiet a rimnar biala festa coller. Quels leva el regalar ad amitgs, pasturs e catschadurs. Ils 40 fests vegnan nudai cun siu segn personal e reparti entras la famiglia dil Marius. Tgei grondius regal!

Dapi il december maunca in zun preziau convischin ch'era daventaus in bien collega ed amitg da biars. Las numerosas sentupadas, ils buns cussegls e discours mauncan.

Il carezau bab, tat, sir e frar fa fetg lartg.

En carezia, *tia famiglia*